

ՏՎԱՐԴՈՒՄՆԵՐ ԵՎ ՆԿԱՏՈՂՈՒԹՅՈՒՆՆԵՐ СООБЩЕНИЯ И ЗАМЕТКИ

ԲՈՒԳԱՐ ՔԱՂԱՔԻ ՀԱՅԿԱԿԱՆ ՀՆՈՒԹՅՈՒՆՆԵՐԸ

Հ. Մ. ԶԱՆՓՈՒԱԴՅԱՆ

Վոլգա գետի միջին հոսանքում, Կաղան քաղաքից հարավ գոյություն ունեցող հայկական հնությունների մասին հայտնի էր դեռևս XVIII դարում, երես Միխայիլովի 1712 թ. պաշտոնական հաղորդումից, որը կաղավաժ էր ուսական մուսուլմանների վանքի մայր եկեղեցու կառուցման կապակցությամբ: Միխայիլովը ուսումնասիրել և հաշվառել էր Վոլգայի ափին գտնվող միջնադարյան բուլգար քաղաքի հնությունները: Հիշյալ փաստաթղթում, մահմեդական հնություններից բացի, հիշատակվում են նաև քրիստոնեական-հայկական հուշարձաններ:

«Քաղաքի պարիսպներից դուրս,— ասված է այնտեղ,— Վոլգա գետի ուղղությամբ գտնվում է մի քառակյունի սրահ, քանդված, առանց կամարների... երևում է, որ այդ սրահը նախկինում եկեղեցի է եղել, քանի որ նրա շուրջը կան մեծ թվով արձանագրություններ կրող դամբարաններ, իսկ այդ արձանագրությունները հիշեցնում են հայկական գրերը»¹: Պետրոս I թագավորը, 1722 թ. Մեծ Բուլգար քաղաքն այցելելիս, հետաքրքրվում է նաև վերը հիշված քառակյունի շինությամբ և նրա սկզբնական տեսքով: Բավարար պատասխան չստանալով, թագավորը կարգադրում է հավաքել օտար լեզուներով (արաբատառ և հայերեն) բոլոր արձանագրությունները և դրանք ենթարկել գիտական ուսումնասիրության²:

Այս կարգադրությունից հետո հիշյալ հնություններն արժանանում են ազգեմիական հիմնարկների ուշադրությանը: Կայսերական գիտությունների ակադեմիան XVIII դարի ընթացքում մի քանի գիտարշավներ է ուղարկում այդ հնավայրն ուսումնասիրելու:

Հայկական արձանագրությունները գրված էին տապանաքարերի վրա: Սկզբնական շրջանում հայտնի էին միայն չորսը: Այդ արձանագրություններն առաջինը ընթերցել է հայազգի Իվան Վասիլևը: Նույն այս արձանագրությունները, ձշտելով և լրացնելով, հետագայում հրատարակում են Սեն-Մարտենը և Բրոսսեն: Տապանաքարերի քայքայվածության և արձանագրությունների թերի լինելու պատճառով, հնարավոր է լինում վերականգնել միայն մի քանի անձնանուններ և տարեթվեր: Համաձայն այդ արձանագրությունների, տապանաքարերը վերաբերում են XIII—XV դարերին: Այս չորս քարերին հետագայում ավելանում են ևս երեքը՝ գտնված քաղաքի տարբեր վայրերում, որոնց վրայր արձանագրությունները, զավոք, նույնպես շատ հակիրճ են և դժվար ընթերցելի³:

¹ К. И. Новоструев, О городищах древнего Волжско-Болгарского и Казанского царства. «Труды I археол. съезда», т. I, М., 1869, т. II, М., 1871, № 538.

² С. М. Шпилевский, Древние города и другие булгаро-татарские памятники в Казанской губернии. Казань, 1877, № 226.

³ Б. А. Миллер, Об армянских надписях в Болгарах и Казани. «Изв. Российск. акад. истории материальной культуры», т. IV, 1925, № 67.

1902 թ. Կազանի «Лестель» ամսագիրը հաղորդում է իր ընթերցողներին, որ Ուսպենսկի վանքի եկեղեցու պատերը որոշ տեղերում շարված են նախկին տապանաքարերով, որոնց վրա կան արարական, թաթարական և հայկական արձանագրություններ: Քիչ չեն շինարարության ժամանակ օգտագործված ալդպիսի արձանագիր քարերը նաև տաճարի ներսում: Լավ տաշված ալդ սալերն օգտագործվել են վանքի հատակի, բնի ու այլ հարգարանքների համար: Բոլգար քաղաքի 1915 թ. պեղումների մասնակից Մ. Բ. Խուդյակովը Եռլնպես հիշատակում է հայատառ տապանաքարերի կրկնակի օգտագործման փաստի մասին և անհանգստանում է, որ ալդ քարերը տակավին չեն ուսումնասիրվել:

Աղագրական և գավառագիտական աշխատություններում ևս Վոլգայի ափին եղած մահմեդական հնություններից բացի, նշվում են հայկական հնությունները:

Բոլգար քաղաքի XIII դ. մի նկարագրության մեջ ասված է, որ «մեծ հողապատնեշից դուրս Վոլգայի ափին գտնվում է մի քառանիստ տաճար, սրա մասին թաթարական լեզվով եղած ավանդությունները պատմում են, որ այն հայկական եկեղեցի է եղել: Այդ տաճարից ոչ հեռու, շանապարհի վրա կա ևս մի շենք շատ ավերված վիճակում, որը եղել է հայկական մատուռ»: Գոյություն ունեն մի քանի նկարագրություններ ևս, որոնք այս շենքն անվանում են «Հունական պալատ» (նկատի ունենալով, որ այստեղ գտնվել են սրբապատկերներ, խաչեր և քրիստոնեական եկեղեցու այլ պարագաներ) և նշում են, որ համաձայն հատակագծի, այս շենքը հավանաբար քրիստոնեական եկեղեցի է եղել: Կ. Ի. Նովոստրուկը գրում է. «Քանի որ եկեղեցու շուրջը եղած արձանագրությունները հայերեն են, ապա եկեղեցին էլ եղել է, հավանաբար, հայկական և ոչ հունական»:

Ահա այսպիսի տեղեկություններ կային Վոլգայի միջին հոսանքում գտնվող Մեծ Բոլգար քաղաքի ավերակներում եղած հայկական հնությունների մասին, երբ 1916 թ. Կազանի «Հնագետների, պատմաբանների և ազգագրագետների ընկերությունը» Վ. Ֆ. Սմոլինի ղեկավարությամբ ձեռնարկեց, այսպես կոչված, «Հունական պալատի» պեղումները: Պեղումները ցույց տվեցին, որ այդ քառանկյունի շենքն, իրոք, եղել է քրիստոնեական եկեղեցի: Այդ մասին են վկայում շենքի հատակագիծը, նրա ներսում և շուրջը եղած դամբարանների զիրքավորումը արևելքից արևմուտք: Բացվեցին նաև տաճարից դեպի Վոլգա գետն իջնող քարե աստիճանները:

Վ. Ֆ. Սմոլինի հետագա ուսումնասիրությունները նրան հանգեցրին մի շատ կարևոր եզրակացության, որի համաձայն եկեղեցու շուրջը, հավանաբար, եղել է քրիստոնյա բնակչության բնակավայր-քաղաքամերձ ավան, և քանի որ եղած արձանագրությունները հայկական են, ապա բնակչության հիմնական մասը, ըստ հրեություն, հայեր են եղել:

Այս բոլոր փաստերը մեծ հետաքրքրություն են առաջացնում գիտնականների շրջանում: Խնդիր է դրվում պարզելու Վոլգայի ափին հայկական գաղութի գոյության փաստը, նրա ծագման, հարատևման ժամանակը և կատարած դերը հյուսիսային առևտրի մեջ:

⁴ Նույն տեղում, էջ 73:

⁵ А. П. Смирнов. Армянская колония города Болгар, М.—Л., 1958, էջ 333; «Материалы по исследованию археологии СССР» (հետազոտում՝ МИА), вып. 61.

1925 թ. Բ. Ա. Միլլերը մի հետաքրքրական հոդված է գրում Բուլղար քաղաքում և Կաղանում գտնված հայկական արձանագրությունների մասին, որտեղ մանրամասն քննարկելով հայկական հնությունների վերաբերյալ եղած բոլոր տեղեկությունները, առաջ է քաշում մի հետաքրքրական թեզ՝ Այդ թեզի համաձայն, քանի որ մետաքսի առևտրի հյուսիսային ուղին գտնվում է հայ վաճառականների ձեռքին, իսկ սրանք իրենց բնակավայրերը համ առևտրական գաղութները, հավանաբար, հիմնում էին առևտրական ճանապարհների բանուկ կետերում, ապա հայկական հնությունների մնացորդները պետք է փնտրել Վուլգա—Կամա գետերի առևտրական մայրուղու երկարությամբ։ Նա միաժամանակ նշում է, որ այդ վայրերում մինչև հիմա շատ աղոտ ձևով պահպանված են երբեմնի հայկական բնակչության հետքերը՝ Վլատկայի նավահանգիստներից մեկը կոչվում է «Армянская—Эрменская», շուվաշների լեզվով մետաքսը մինչև հիմա կոչվում է «ермен пурсан», այսինքն «հայկական մետաքս»⁶։

X—XIV դդ. Վուլգա գետի միջին հոսանքում ապրող բուլղարները մեծ դեր են խաղացել ժամանակի միջազգային կյանքում։ Դեռևս X դարում նրանց ստեղծած պետությունը Արևելյան Եվրոպայի առաջին պետական կազմավորումներից մեկն էր, որի մայրաքաղաք Բուլղարը հանդիսանում էր միջնադարյան Եվրոպայի կարևորագույն առևտրական քաղաքներից մեկը։ Արաբ պատմիչները խոսում էին նրա մասին որպես միջազգային նշանակություն ունեցող ստանալաճառի։

Բուլղար քաղաքի ավերակները գտնվում են Թաթարական ԻՍՍՀ Կույբիշևի մարզում, Վուլգա գետի բարձրագույն ափին։ Այս հնավայրի սիստեմատիկ պեղումներն սկսվել են 1938 թ., Վուլգա գետի ափին Կույբիշևյան մեծ էլեկտրակայանի կառուցման աշխատանքների կապակցությամբ և որոշ ընդմիջումներով շարունակվում են մինչև այսօր։ Պեղումները վարում է ՍՍՀՄ գիտությունների ակադեմիայի հնագիտության ինստիտուտի արշավախումբը՝ պրոֆ. Ա. Պ. Սմիրնովի ղեկավարությամբ⁷։

Երկարամյա և գիտական բարձր կազմակերպվածությամբ տարվող աշխատանքների շնորհիվ հնարավոր եղավ վերականգնել Վուլգա գետի ափին ապրող ժողովուրդների պատմության տարբեր փուլերը՝ սկսած հնագույն ժամանակներից, հետադուրս նրանց կյանքի պատմական ընթացքը։ Այդ պեղումները հնարավորություն տվեցին բացել մի էջ նաև հալ ժողովրդի գաղթօջախների պատմությունից։

1946—1947 թթ. արշավախմբի նպատակներից մեկն էր Բուլղար քաղաքի սլավոններից դուրս գտնվող «Հունական պալատ» կոչված հայկական եկեղեցու հատակագծի վերջնական պարզաբանումը և նրա շուրջը եղած տարածությունից պատմա-հնագիտական ուսումնասիրությունը։

Տաճարից արևմուտք ընկած հողերի ուսումնասիրությունը ցույց տվեց, որ ողջ այդ տարածությունը, գետի բարձր ափի ուղղությամբ, հիմնականում բնակեցված է եղել Հնագույն շևոնների հետքերը ձգված են Երեք կիլոմետրից ավելի երկարությամբ։ Այդ շենքերը հիմնականում կառուցված են եղել սպիտակ քարից։

⁶ Б. А. Миллер, *Узл. арх.*, էջ 79։

⁷ А. П. Смирнов, *Волжские булгары*. «Труды Гос. историч. музея», вып. 19; А. П. Смирнов и П. Я. Мерперт, *МНА*, вып. 42, էջ 5—20։

Համաձայն հնագիտական նյութերի տվյալների, այստեղ բնակության հնագույն փաստը X դարից է և հասնում է մինչև XV դարի առաջին կեսը⁸։ Բնչպես կարծում են ուսումնասիրողները, հավանական է, որ հենց այդ ժամանակներից աշտեղ բնակություն են հաստատել հայերը և հատկապես հայ վաճառականները։

Բուզար քաղաքի հետ հայերի ունեցած առևտրական կապերի մասին գրավոր տեղեկությունները վերաբերում են X դարին։

922 թ. աբար խալիֆ Մուկադդագիրը դիվանագիտական պատգամավորություն է ուղարկում բուզարների թագավոր Ալմուշի մոտ, վերջինիս մահմեդականություն ընդունելու առթիվ։ Այդ մասին մանրամասն տեղեկություններ է պահպանել պատգամավորության մասնակից Ահմեդ Իբն Ֆադլանը։ Նկարագրելով բուզարների կյանքն ու կենցաղը, Ֆադլանը գրում է, որ նրանք բոլորն էլ ապրում էին վրաններում, այն տարբերությամբ միայն, որ թագավորի վրանը շատ ընդարձակ էր և կեսից ավելին ծածկված հայկական գորգերով։ Այս փաստով Իբն Ֆադլանը ցանկացել է նշել բուզարների թագավորի հարստությունը և նրա բնակարանի շքեղությունը, քանի որ նրան շատ լավ հայտնի էին հայկական գորգերի մեծ համբավն ու արժեքը, որոնք այդ ժամանակ արդեն հռչակված էին և պնդատվում էին շատ թանկ ու մատչելի էին միայն մեծահարուստ անձանց։ Մեզ համար տվյալ տեղեկությունը հետաքրքրական է որպես X դարում գոյություն ունեցած հայ-բուզարական առևտրական հարաբերությունների մասին վկայող փաստ։

Հնագիտական պեղումներից ստացված տվյալները և վերը նշված տեղեկությունը մեզ բերում է այն եզրակացության, որ X դարում հայ-բուզարական առևտրական կապերը պատահական, միջադեպային բնույթ չէին կրում։ Շատ հավանական է, որ այդ ժամանակ հայ վաճառականներից ոմանք իրենց ունեցած աշխույժ առևտրական կապերի պատճառով արդեն մշտական բնակություն էին հաստատել Վոլգայի ափերին։

Միջնադարում, ինչպես հայտնի է ժամանակակիցների տեղեկություններից, օտար առևտրականներն իրենց քարավաններով իրավունք չունեին իջևանել և ապրել քաղաքի պարսպապատված մասում։ Համաձայն ընդունված կարգի, նրանք իջևանում էին պարսպից դուրս։ Եթե վաճառականներն այդ երկրի հետ ունեին մշտական կապեր, ապա նրանք իջևանում էին նախօրոք հատկացված վայրերում, ավաններում կամ արվարձաններում։ Առևտրականներից ոմանք այդ վայրերում հիմնում էին իրենց հենակետերը, քարավանատները, պահեստային շենքերը։ Նրանցից ոմանք աստիճանաբար մշտական բնակություն էին հաստատում, և ժամանակի ընթացքում այդ ավանները ընդարձակվելով վերածվում էին ազգային գաղութների։ Ամենայն հավանականությամբ այս կերպ է ստեղծվել նաև Վոլգա գետի ափի հայկական գաղութը, որը սկզբնական շրջանում (ոչ ուշ քան X դ.) եղել է փոքր առևտրական ավան Բու-

⁸ А. М. Ефимова, О. С. Хованская, И. Ф. Калинин, А. П. Смирнов, Раскопки развалин Великих Болтар в 1946 г. «Краткие сообщ. инст. материальн. культуры» (այսուհետ՝ КСИИМК), вып. 21, 1947, էջ 102—111։

⁹ А. П. Ковалевский, Книга Ахмеда Ибн-Фадлана и его путешествие на Волгу в 921—922 гг., Харьков, 1956, էջ 137։

վար քաղաքի պարիսպներից դուրս: Ժամանակի ընթացքում, առևտրի աշխուժացման հետևանքով այն ընդարձակվել է և XIII—XIV դդ. դարձել քաղաքի կարևոր արվարձաններից մեկը: Նրա կենտրոնում կառուցվել է եկեղեցի, որի շուրջն էին հավաքվում ոչ միայն հայերը, այլև բուդարների մայրաքաղաքում ապրող այլազգի քրիստոնյաները:

Հնագիտական արշավախմբի աշխատանքների արդյունքների մանրադնին ուսումնասիրության շնորհիվ, աշխատանքների ղեկավար Ա. Պ. Սմիրնովին և մինչ այդ պեղումներ կատարող ճարտարապետ Վ. Ֆ. Սմոլինին հաջողվել է պարզել, այսպես կոչված, «Հունական պալատի», իրականում՝ հայկական եկեղեցու դիրքը, ճարտարապետական ոճը, շինարարական այլ մանրամասները¹⁰:

Տաճարը, որը հավանաբար գտնվում էր ավանի կենտրոնում, ունեցել է քառակյունի հատակագիծ՝ 16,4 մ երկարությամբ և 12,6 մ լայնությամբ, աբսիդից արևմուտք դիրքավորումով: Մուտքը տեղավորված է եղել արևմտյան կողմում: Հարավային և հյուսիսային պատերն ունեցել են քառակյունի որմնասյուներ: Եկեղեցին կառուցված է եղել XIII—XIV դդ. և կրկնել է XII—XIII դդ. Հայաստանում իր կատարելիությանը հասած երկհարկանի եկեղեցի-դամբարանների (նոր Եփեսոսի գրատուն-ժամատունը, Եղվարդի ժամատունը և Բուրթնի Օրբելյանի նորավանքում կառուցած Աստվածածին եկեղեցին) ճարտարապետությունը:

Եկեղեցու առաջին հարկը ծառայել է որպես տապանատուն: Հետաքրքրական է, որ այս տիպի եկեղեցիներ կառուցվել են նաև հայկական ուրիշ գաղթավայրերում (Բեռդոսիա, Հին-Ղրիմ և այլն):

Հուշարձանի ուսումնասիրությունը հնարավորություն է տալիս պարզել նաև մի հետաքրքրական փաստ: Տաճարի շինարարությանը տեղական վարպետների հետ միասին, հավանաբար, մասնակցել են նաև Հայաստանից եկած վարպետներ: Այդ մասին են վկայում շարվածքի ձևը, շինանյութերի պատրաստման եղանակը¹¹:

Սակայն մինչ տվյալ եկեղեցու կառուցումը, հայկական գաղութը հավանորեն ունեցել է մի այլ, ավելի փոքր և անշուք եկեղեցի: Այդ են վկայում պարսպից դուրս եղած հայկական մատուռի հիմքի հետքերը: Մատուռը կոչված այդ շենքը կարող էր լինել հայկական գաղութի սկզբնական շրջանում կառուցված եկեղեցին, որը գաղութի աճելուց հետո, նրա տնտեսական հզորացման (XIII—XIV դդ.) հետ փոխարինվել է ավելի մեծ և շքեղ եկեղեցիով: Բուդար քաղաքի պեղումների հետևանքով բացված մի շարք քաղաքացիական շենքերի ճարտարապետական ուսումնասիրությունը բերում է այն եզրակացության, որ հայկական ճարտարապետության ազդեցությունը այդ քաղաքում դուրս է եկել աղգային սահմաններից: Այդ մասին են խոսում քաղաքում կառուցված բաղնիքները, որոնք հիմնականում կրկնում են հայկական բաղնիքների ճարտարապետական և կառուցողական ոճը¹²:

Մեզ համար սուանձնահատուկ հետաքրքրություն են ներկայացնում եկեղեցու ներքնահարկի և նրա շուրջը եղած 113 դամբարանների պեղումների արդյունքները:

10 А. П. Смирнов, Армянская колония города Болгар, էջ 338, 342.

11 Նույն տեղում, էջ 343.

12 О. С. Хованская, Бани города Болгар, МИА, вып. 42, էջ 422.

Դամբարաններն իրենցից ներկայացնում են արևելքից արևմուտք դիրքավորված քառանկյունի ոչ շատ խոր փոսեր, որտեղ պահպանվել են փոշիացած փայտե դագաղների հետքեր և դամբարաններում գտնված դանգերի մարդաբանական ուսումնասիրությունից, որը կատարել է պրոֆ. Գ. Ֆ. Դերեցր. պարզվում է, որ նրանց մեծագույն մասը պատկանել է տիպիկ արմենոիդ գանգերի խմբին. սակայն այնտեղ թաղվել են նաև այլազգի քրիստոնյաներ¹³:

Չնայած դամբարաններում գտնված իրերի սակավությանը (քրիստոնեական եկեղեցին արգելում էր իրեր թաղել հանգուցյալի հետ), պահպանված թանկարժեք գործվածքների մնացորդները և ոսկե ու արծաթե զարդերի գոյությունը ուսումնասիրողներին հնարավորություն են տվել եզրակացնել, որ այս դամբարաններում, հավանաբար, թաղված են եղել ունևոր մարդիկ: Դամբարաններից իննի մեջ հայտնաբերվել են դիպակի, մետաքսե բանվածքների, ոսկե և արծաթե թելերով հյուսված կերպասների և գորգի մնացորդներ: Չնայած փոքր բանակին և քայքայված վիճակին, այս հազվագյուտ հնագիտական նյութերը գիտական կարևոր նշանակություն ունեն: Գործվածքների նյութը, հյուսման եղանակը, նախշերի գեղարվեստական ոճը և այլ մանրամասնություններ հիմք են տալիս արհեստների, արվեստի և առևտրական հարաբերությունների մի շարք խնդիրների լուսաբանման համար: Հրապարակելով այդ արժեքավոր նյութերը, հնագետները և գործվածքների տեխնոլոգիայի պատմության մասնագետները իրենց աշխատություններում նշում են այս գործվածքների մի մասի ոչ տեղական ծագումը:



Նկ. 1:

Ա. Պ. Սմիրնովը, քննարկելով դամբարաններից մեկում գտնված գործվածքի այն կտորը, որի վրա ձեռագործված են երկու պարող մարդ, նշում է նրանց հնարավոր կովկասյան, կամ նույնիսկ հայկական ծագումը (նկ. 1): Այդ եզրակացության է հանգեցրել նրան այս պատկերի հատկապես արվեստաբանական համեմատությունը հայկական վարդարվեստի մի քանի օրինակների հետ: Այսպես, նա տղամարդու գլխարկի մոտակա զուգահեռն է տեսնում Հաղբատի վանքի իշխան խութու Բուդային պատկերող որմնանկարի վրա¹⁴: Այդ պարի ողջ տեսարանի համար շատ ավելի


¹³ А. П. Смирнов, Армянская колония города Болгар, էջ 343:

¹⁴ Նույն տեղում, էջ 353:

մոտակա զուգահեռ է Դվինի դաջազարդ կարասներից մեկի գոտու պարի տեսարանը, ուր մեծ նմանութիւն կա թե՛ պատկերի ընդհանուր կառուցվածքի, և թե՛ պարող մարդկանց հագուստի մանրամասների մեջ¹⁵։

Գտնված բոլոր պատառիկներից Ս. Ս. Վիդոնովային հաջողվել է պարզել միայն N 102 դամբարանից հանված մետաքսե, ոսկե թելերով զարդարված շղարշի գործածման նպատակը՝ այն հավանաբար եղել է գլխի ծածկոց¹⁶։ Այս շղարշը և այլ դամբարաններից գտնված որոշ ձեռագործներ մեզ հիշեցնում են Եփեսոսի անոցի Տիգրան Հոնենցի տոհմական գերեզմանոցի մի դամբարանում գտնված ձեռագործ զարդերով հլիսաշորը։

Այս հերեզմանը, որը պեղված է 1908 թ. Անի քաղաքի Ծաղկոցաձորի ժայռակույի դամբարաններից մեկում, հավանաբար պատկանել է 6—7 տարեկան աղջնակի։ Դամբարանի և շրջակա օդի շորութիւն պատճառով հազվադեպ լայն էն պահպանվել ինչպես դիակը, այնպես էլ հագուստները¹⁷։ Աղջնակի հագուստը կարված է բաց սրճագույն նուրբ մետաքսից, որը լրացուցիչ գործված է կարմիր մետաքսե թելերով։ Զգեստը ունի պարզ ձև. կրծքի մոտ կտրվածք,



Նկ. 2:

լայնացող քղանցք, օծիքը վարդարված է վեց թերթանոց վարդյակներով։ Թևերն ունեն հատուկ գործված բազկակալներ, իսկ արմունկից վեր դրված են հատուկ ոսկեկար ժապավեններ, որոնք աղջնակի աղնվական ծագման նշան են համարվում։ Աղջկա կրծքին, զգեստի տակից, դրված է եղել ոսկեթել երկար ժապավեն, իսկ գլխի տակ՝ մետաքսե գործվածք, որը զարդարված է սավառնող


15 Կ. Ղաֆադարյան, Դվին քաղաքը և նրա պեղումները, Երևան, 1952, նկ. 170։

16 Е. С. Видонова, Ткани и шитье XIV в. из раскопок в Болгарах, КСНМЖ. вып. 21, էջ 112—117։

17 И. Орбели, Каталог анийского музея древностей, вып. 1, СПб, 1910, էջ 137։

թռչունների պատկերներով: Աղջկա գլուխը ծածկված է ոսկեզօծ թելերով հյուսված թափանցիկ շղարշով: Շղարշի ձեռագործի մասում, բուսազարդ ֆոնի վրա պատկերված են երկու դեմ-դիմաց կանգնած կենդանիներ, որոնցից մեկը հավանաբար վագր է, մյուսը՝ առյուծ: Գաղանները պատկերված են մեծ վարպետությամբ. արտահայտված են դեմքի և մարմնի բոլոր մանրամասնությունները: Ոսկե և արծաթե թելերի հաջորդաբար օգտագործումը պատկերին տալիս է բնորոշ արտահայտություն (նկ. 2): Օձիքի վարդյակները և վզին գցված շղթան ձեռագործված են նույն ոճով:

Բոլգար քաղաքի հայկական դերեզմանոցի № 97 դամբարանում գտնված մետաքսե երկու պատառիկների վրա, որոնք հավանաբար նույնպես գլխաշորի մնացորդներ են, մենք հանդիպում ենք մի ձեռագործ պատկերի, շատ նման Անիի զույգ գաղանների պատկերին (նկ. 3): Թեև Վոլգայի ափին գտնված



նկ. 3:

գործվածքի ձեռագործը մի քիչ ավելի կոպիտ է, քան Անիինը, բայց դրանք գաղանների պատկերման մեջ ունեն շատ ընդհանուր գծեր (մեծ գլուխ, տափակ դունչ, ճիրանները դուրս ցցված թաթեր): Ձեռագործը բաժնված է մետաղյա և մետաքսի թելերի բարձրագույն կարի եղանակով: Հավանաբար գլխաշորի մնացորդներ էին նաև հայկական գաղութի №№ 7, 15, 43 և 94 դամբարաններում գտնված մետաքսի մնացորդները: Միանման ձեռագործով գլխի շղարշի գոյությունը Վոլգայի ափին ապրող կանանց և անեցի աղջկա դամբարանում՝ կարող է ազգային սովորության մի արտահայտությունը լինել:

Հ. Օրբելին Անիի թանգարանի ցուցակում նկարագրում է մի գործվածք՝ գտնված Տիգրան Հռենեցի տոհմական դերեզմանոցի մի այլ դամբարանում: Նա նշում է, որ այդ դամբարանը բացելիս դիակի վրա գտնվել են մեծ քանակությամբ խճճված թելեր: Սկզբում թվացել է, թե այդ թելերով փաթաթված է եղել դիակը, բայց մաքրելուց հետո պարզվել է, որ դա մանիշակագույն գործ-

վածքի քանդված թելերն են: Նման պատկերի ենք հանդիպում նաև Վուլգայի ափի № 25 դամբարանում: Այստեղ էլ չի պահպանվել հիմնական կտորը, որի մեջ, հավանաբար, փաթաթված կամ որով ծածկված է եղել դիակը, մնացել են միայն մետաքսե թելերը¹⁸: Հագուստի ևս մի մաս իր զուգահեռն ունի մեր ուսումնասիրած Էրկու դամբարաններում. դա ոսկեկար ժապավեններն են, որ տնեցի աղջնակի զգեստին դրված են թևերի վրա, իսկ Բուլղար քաղաքի դամբարանում՝ հագուստի քղանցքին:

Ինչպես ցույց է տալիս անեցի աղջկա հագուստների և Վուլգայի ափին ապրող հայուհիների դամբարաններում գտնված գործվածքների պատմա-արվեստագիտական ուսումնասիրությունը, դրանք ամենայն հավանականությամբ հայկական ծագում ունեն և հանդիսանում են հայկական մանվածագործության հազվագյուտ նմուշներ¹⁹:

Այս նմանությունները հավանաբար հետևանք են այն սերտ կապերի, որ գոյություն են ունեցել հեռավոր հայկական այդ գաղութի և մայր հայրենիքի միջև: Տասնյակ տարիների ընթացքում ապրանքների հակերով ծանրաբեռնված առևտրական քարավանները Անիից, Դվինից և հայկական մյուս վաճառաշահ քաղաքներից երկար ճանապարհ կտրելով, Կասպից ծովի ափերով հասնում էին Արևելյան Եվրոպայի տափաստաններն ու Վուլգա գետի ափերը և իրենց հանգրվանն էին գտնում Բուլղար քաղաքի հայկական գաղութում:

Ուսումնասիրելով Բուլղար քաղաքի հայկական գաղութի դամբարանները պեղածո առարկաները, Ա. Պ. Սմիրնովը հանգել է այն կարծիքին, որ այնտեղ, ըստ երևույթին, թաղված են եղել վաճառականներ, որոնք զբաղվում էին միջազգային առևտրով²⁰:

Գուցե պատահական չեն Վուլգա գետի ափին ապրող հայ առևտրականների և Տիգրան Հոնենցի ընտանիքի անդամներից մեկի հագուստների զուգահեռությունները: Տիգրան Հոնենցը Անիի XIII դ. առաջին կեսի մեծահարուստ քաղաքացիներից մեկն էր: Հոնենցի ունեցած հարստության մասին մենք պատկերացում ենք ստանում այն արձանագրությունից, որը քանդակված է իր իսկ հրամանով Անիի Սբ. Գրիգոր եկեղեցու պատին, եկեղեցու կառուցման և վերջինիս տրված նվերների կապակցությամբ²¹: Այստեղ թվարկված հողերի, գյուղերի, այգիների, հյուրանոցների, քարավանատների, խառնուրդների և կառնիկ դրամի քանակով դժվար չէ եզրակացնել, թե ինչ հսկայական հարստության տեր է եղել նվիրատուն:

Շատ հավանական է, որ Տիգրան Հոնենցը պատկանում էր այն վաճառականների թվին, որոնք իրենց քարավաններն էին ուղարկում Միջին Ասիա, Ռուսաստան և Վուլգայի ափերը:

Բուլղար քաղաքի հայկական գաղութի ազգային համալրման աղբյուրներից մեկը եղել է արտագաղթը, որը սկսվել էր Հայաստանում և սաստկացել հատկապես XI դարի երկրորդ կեսից: Պատմական փաստերին ավելի հարավատ է գոյություն ունեցող այն տեսակետը, որ ինչպես Անի քաղաքի, այնպես

18 Նույն տեղում, էջ 39:

19 Р. М. Жанполадян, О двух тканях из Анн и Болгар. «Краткие сообщ. Инст. археологии», вып. 132.

20 А. П. Смирнов, Армянская колония города Болгар, էջ 350.

21 «Դիվան հայ վիճագրության», Անի քաղաք, Երևան, 1966, էջ 63:

էլ, հավանաբար, Հայաստանի այլ շրջանների ու քաղաքների բնակիչները թողել են իրենց բնակավայրերը և հեռացել ոչ թե վանդավաժային արտագաղթի միջոցով, այլ մաս-մաս, մի շարք տասնամյակների ընթացքում²²։

Արտագաղթող այդ ընտանիքները բնակություն են հաստատել ոչ թե իրենց համար անծանոթ նոր վայրերում, այլ այն տեղերում, որտեղ վաղօրոք գոյություն ունեին հայկական գաղթօջախներ։ Իսկ դրանք մեծ մասամբ հանդիսանում էին այն առևտրական կետերը, որտեղ ժամանակի ընթացքում իրենց հենարաններն էին ստեղծել և ապա բնակություն հաստատել հայ վաճառականներն ընտանիքներով։

Բոլգար քաղաքի հայկական գաղութը հանդիսացել է այդպիսի օջախներից մեկը, որը ստեղծվել էր X դարում, որպես մի փոքր առևտրական ավան, վաճառաչահ քաղաքի պարիսպներից դուրս։ Աստիճանաբար, արևելքի և արևմուտքի միջև ընկած առևտրական ճանապարհների մայրուղու դեպի Վոլգա գետը և Արևմտյան Նվրոպայի տափաստանները տեղափոխվելու կապակցությամբ, սկսում է հզորանալ այդ ճանապարհների խաչմերուկում գտնվող Բոլգար քաղաքը, բարգավաճում և ընդարձակվում է նաև հայկական գաղութը։

Բոլգար քաղաքի առևտրականները դառնում են միջազգային տարանցիկ առևտրի միջնորդները և իրենց մենաշնորհն են դարձնում հյուսիսային ժողովուրդների հետ կատարվող թանկարժեք մորթիների շահավետ ողջ առևտուրը։ Շատ հավանական է, որ այդ առևտրականների թվում կային նաև հայազգի վաճառականներ։ Այդ հարցի վերջնական պատասխանը կտան միայն հետագա ուսումնասիրությունները։ Մինչ այդ, սակայն, այստեղ անհարկի չենք համարում հիշատակելու այն փաստը, որ հեռավոր հյուսիսում, մերձբևեռային Ռուրում, Տյումենի մարզի Մալայա Տինագոտա գետի ափին 1969 թ. գտնված է մի թուր, որը մասնագետների կողմից թվագրվում է XII—XIII դարերով։ Թրի վրա եղած հայերեն արձանագրությունը հաղորդում է, որ այն պատրաստել է վարպետ Խաչատուրը²³։

Բոլգար քաղաքի հայկական գաղութն իր բարգավաճման շրջանն է ապրել հատկապես XIII—XIV դդ.։ 1431 թ. Ոսկե Հորդայի խան Բուլակ Թիմարի կողմից Բոլգար քաղաքի ավերման ժամանակ, հավանաբար, հատկապես ուժեղ հարված է ստացել քաղաքի պարիսպներից դուրս գտնվող հայկական գաղութը, որի բնակչությունը հեռացել է այստեղից և բնակություն հաստատել նոր հզորացող Վաղան քաղաքում²⁴։

22 Լ. Խաչիկյան, էջեր համընկհայ պատմությունից, «Բանբեր Երևանի համալսարանի», 1969, № 2, էջ 119, ծան. 12։

23 Р. М. Жанполадян, А. И. Кирпичникова, Средневековая сабля с армянской надписью, найденная в приполярном Урале, «Эпиграфика Востока», вып. 22.

24 А. П. Смирнов, Армянская колония города Болгар, էջ 343։